

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : LISAN

DARIPADA : DATUK JUSLIE BIN AJIROL [LIBARAN]

TARIKH : 13 NOVEMBER 2014

RUJUKAN : 7211

SOALAN:

Datuk Juslie bin Ajirol [Libaran] minta **MENTERI DALAM NEGERI** menyatakan hasil setakat ini menerusi pasukan khas Polis Diraja Malaysia (PDRM) bersama Suruhanjaya Komunikasi dan Multimedia Malaysia bagi menyiasat dan memburu individu yang menggerakkan usaha untuk membawa Sabah keluar dari Malaysia.

JAWAPAN:

Tuan Yang di-Pertua,

Pihak Kementerian memandang serius tentang isu yang boleh menjejaskan perpaduan dan juga keharmonian yang terpelihara sekian lama terutama isu yang berkaitan dengan isu kemerdekaan negara seperti usaha menggerakkan untuk membawa keluar Sabah dan Sarawak keluar dari Malaysia oleh sesetengah pihak yang tidak bertanggungjawab. Kumpulan atau orang perseorangan ini menggunakan laman sosial dengan menyebarkan dakyah dan maklumat-maklumat yang palsu dan tidak tepat dengan tujuan untuk menghasut rakyat terutama di Sabah dan Sarawak agar keluar dari Malaysia. PDRM tidak akan berdiam diri untuk menyiasat dan membawa petualang negara ini ke muka pengadilan.

Pihak PDRM telah membuka kertas siasatan berkaitan tulisan dalam blog di laman sosial berkaitan perkara ini seperti berikut:-

- i) Karamuning repot 13205/14 bertarikh 2 September 2014 di bawah seksyen 4 (1) Akta Hasutan. Suspek menggelarkan dirinya sebagai Doris Jones dengan menubuhkan Pertubuhan Sabah, Sarawak Keluar Malaysia dan telah membuat *posting* di *Facebook, Twitter, Blog, Newsletter*, seminar dan ceramah dengan menanam kebencian terhadap Kerajaan Persekutuan, menghina pemimpin negara, menghina orang Melayu dan

agama Islam. Siasatan masih dijalankan dengan bantuan SKMM bagi mengenalpasti domain pemilik laman sosial berkenaan.

- ii) Tuaran Repot 3131/2014 di bawah Seksyen 4 (1) Akta Hasutan 1948 dan Seksyen 233 Akta Komunikasi Multimedia 1998. Siasatan mendapati cubaan satu laman web bagi mengeluarkan kenyataan yang berunsur fitnah dan hasutan agar Sabah dan Sarawak keluar Malaysia. Laman web berkenaan <http://www.gopetition.com/petition/sabah-sarawak-right.html> yang bertajuk “Sabah Sarawak Keluar Malaysia”. Siasatan mendapati pemilik laman blog menggunakan laman blog sebagai medan menyebarkan fakta-fakta yang tidak benar memburukkan Kerajaan Malaysia. Kertas siasatan masih menunggu laporan daripada SKMM bagi mengenalpasti pemilik laman blog tersebut.

- iii) Satok Repot 4139/2014 di bawah Seksyen 4 (1)(c) Akta Hasutan 1948. Siasatan berhubung dengan satu laman sosial Facebook yang dikendalikan oleh Presiden Pertubuhan Aspirasi Rakyat Sarawak (SAPA) iaitu Lina Soo telah mengajak orang ramai agar menyertai satu taklimat bertajuk “Malaysia Agreement 1963 (Kuching : Talk On MA63). Laman Facebook SAPA <http://www.facebook.com/sapasarawak> telah digunakan bagi menyalurkan pelbagai maklumat yang boleh menjejaskan keharmonian dan ketenteraman awam. Siasatan pihak polis masih lagi diteruskan bagi mengenalpasti tujuan

pergerakan dan fungsi Pertubuhan SAPA menganjurkan sesi taklimat berkenaan.

Adalah diharapkan agar rakyat tidak mudah tertipu dan terpedaya dengan dakwah sedemikian yang boleh merosakkan perpaduan yang dijalin selama ini. Saya menyeru agar rakyat merujuk kepada pihak yang berwajib untuk mendapatkan berita yang benar dan sahih dan tidak terpengaruh atau menerima segala berita di laman sosial sebagai perkara yang benar tanpa membuat pertanyaan dan rujukan kepada pihak berwajib terlebih dahulu.

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN

TARIKH : 13 NOVEMBER 2014
[KHAMIS]

DARIPADA : Y.B. TUAN WONG TIEN FATT @ WONG NYUK
FOH
[SANDAKAN]

SOALAN :-

Y.B. TUAN WONG TIEN FATT @ WONG NYUK FOH [SANDAKAN] minta **MENTERI KESEJAHTERAAN BANDAR, PERUMAHAN DAN KERAJAAN** menyatakan berapakah Program Perumahan Rakyat (PPR) telah dan akan dilancarkan dari tahun 2010-2020 di kawasan Sandakan. Berapakah peruntukan telah disediakan untuk maksud ini dan berapakah purata harga rumah seunit.

JAWAPAN :-

Tuan Yang di-Pertua,

Untuk makluman Ahli Yang Berhormat, sehingga 31 Ogos 2014, Jabatan Perumahan Negara, Kementerian Kesejahteraan Bandar, Perumahan dan Kerajaan Tempatan telah dan sedang menyiapkan 8 projek (5,180 unit rumah) perumahan Program Perumahan Rakyat (PPR) di Sandakan dengan kos sebanyak RM569.7 juta. Harga jualan bagi seunit rumah adalah RM42,000 bagi Sabah dan Sarawak.